

Date – 22/12/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Home Minister Pu K.Sapdanga'n hunpui puala midangte hnena luangchhuak an awm thin chu lawmawm atih thu sawiin uar deuh turin mipuite a sawm.
2. Krismas leh Kumthar lo thleng turah mipui chetvelna Aizawl bazar chu kumdang zawng aiin a tawt hma tih Aizawl New Market enkawltuten an sawi.
3. Health Minister Pi Lalrinpuii'n Private damdawiin thenkhat zingah Mizoram Universal Health Care Scheme zawm duh an awm tih sawiin thawhhona thuthlung ziahfel tep a ni a ti.
4. President Draupadi Murmu chuan tunhnaia Parliament-in dan thar a pass Viksit Bharat-Guarantee for Rozgar and Ajeevika Mission (Gramin) (Viksit Bharat-G RAM G) Bill, 2025 a pawmpui.

<><><>

HOME MINISTER

Home Minister Pu K.Sapdanga'n hunpui puala midangte hnena luangchhuak an awm thin chu lawmawm atih thu sawiin uar deuh turin mipuite a sawm.

Krismas puala thuchah a sawina ah he thu hi sawiin Pu K. Sapdanga chuan Krismas lo thleng tur chu chatuan nunna atana thilpek hlu ber an dawn hriatrengna anih avangin Krismas hunah Kristiante leh Mizoten, pawl ang leh mimal anga, midangte hnena thilpek hun remchangah an hmang thin chu lawmawm atih thu sawiin uar deuh turin mipuite a sawm.

Home Minister chuan Mizoram chu India rama state ralmuang ber ti a chhal ngam a ni a ti a, chhung lam leh pawn lamah, ralmuanna tiral ti thei boruak engmah awm loin, Mizoram mipuiten ralmuang takin Krismas hun a hmang dawn niin a lang a ti a, Mizoram mipuiten kumin Krismas leh Kumthar hunpui chu thlamuang taka an hman theih nan, sorkar chuan dan leh thupek khauh takin a keng kawh a, mipuiten hunpui chu hlim tak leh ralmuang taka an hman theihna turin, tlawmngai pawlte nen pheikhai rual taka thawkhoin, ruahmanna siam a ni a ti a, mipuite pawhin theihtawp chhuaha dan kengkawhtute tawiawm turin a sawm a ni.

Pu K.Sapdanga chuan Nikum lamah halpuah leh halmawi khauh takin khap a ni a, mipuite pawhin an thlawp tha viau nia a hriat thu a sawi a, kuminah chuan khapna chu sut lovin, sorkar leh tlawmngai pawlte chuan, halpuah leh halmawi that loh dan leh hlauhawm dan inzirtir uar kum atan

hman ni se tia a rel angin thuawih taka lo dawngsawng leh turin mitinte a sawm a, Mizoram chhung leh khawvel ram danga Zo hnahtlak zawng zawngte Krismas leh Kumthar Chibai a buk bawk.

<><><>

CHRISTMAS PREPARATION

Krismas leh Kumthar lo thleng turah mipui chetvelna Aizawl bazar chu kumdang zawng aiin a tawt hma tih Aizawl New Market enkawltuten an sawi.

Commerce & Industries department hnuaia Aizawl New Market hotute chuan Akashvani News zawhna chhangin kumin hian kumdang zawng aiin mipui an tam hmaa an hriat thu an sawi a. Aizawl bazar huamchhunga mipui che vel thunun turin thawktute pawh nilenga an buai thu leh an chawlh hman meuh loh thu an sawi a. Bazar building thar tur sak hna thawh mek a la nih avangin a bul hnaia a hmaa inzuar thin te pawh mipui chetvel a awlsam nan thut an phal loh thu an sawi a ni.

New Market hotute chuan kumdang aiin thil bo leh naupang bo an tlem hret thu an sawi a. Kuminah hian Krismas chu Ninganiah a nih avangin Aizawl pawn atanga bazar tura lo kal te an rawn kal hma hret thu leh bazar hmun tawt lutuk chu tunkar chho ah chuan a thawl hret an beisei thu an sawi a. Theihtawpin mipui chevel mumal taka thunun tur leh thil bo leh rukruk a thlen loh nan aurinna hmanga an au reng thu leh thawktute ngawrh taka an duty reng thu an sawi bawk.

<><><>

NO VEHICLE ZONE

Coordination Committee on Traffic Management thukhawmin a lo rel tawh angin, kumin Krismas leh Kum thar vuakvetah Aizawl khawpui chhunga mipui kea bazar kalte him zawk nan December ni 23, 24 leh ni 31 ah 'No Vehicle Zone' hman tur a ni a, Chanmari leh Zodin Square inkarah chawhma dar 10:30 atanga tlai dar 4:30 chhungin lirthei eng chi mah tlan phal a ni dawn lo a, hei hian Emergency duty bakah natna avanga damdawiin pante a huam lo vang.

Chanmari leh Zodin Square inkarah hian 'No Vehicle Zone' hman a nih lai hian lirthei engmah dah phal a ni dawn lo a, No Vehicle Zone huam chhungah hian chhim leh hmar inkalpawhna kawngpui khar a nih dawn avangin a helna tura ruahman kawngpui dungah traffic jam avanga harsatna a thlen lohna'n bungrua leh lirthei engmah dah phal a ni lo a ni. Coordination Committee on Traffic Mangement hotute chuan No Vehicle Zone helna kawngin a paltlang Local Council hruaituten traffic jam avanga mipuiin harsatna an tawh lohnan theihtawp chhuahpuia kawngpui dunga lirthei leh bungrua dah hnawk a awm loh nan vengchhung information centre atanga puanzar sak turin an ngenin an beisei a ni.

<><><>

FORMER CM WIFE CONDOLENCE

Congress MP Shashi Tharoor chuan Pi Lal Riliani chu Nu ropui leh ngaihsanawm, Mizo ti hmingthatu ani a ti a, a sulhnu ropui tak chu hriatreng ani tawh dawn tih a sawi.

Chief Minister hlui Pu Lal Thanhawla nupui Pi Lal Riliani hi nimin Pathianni khan vui liam niin ui tu a ngah hle a, Sawrkar mi pawimawh tak tak bakah Central lama Congress hotuten an ui thu an sawi a, Congress MP Shashi Tharoor chuan Pi Lal Riliani thi chu Pu Lal Thanhawla te chhungkua bakah Mizo mipuite a tawrhpu takzet a ti a, a sulhnu ropui tak te hriatreng ani tawh dawn tih sawiin a pasal Pu Lal Thanhawla a thlawpna avangin a pasalin hna ropui tak a thawk thei tih sawiin a phena hna ropui a thawh chu chhuanawm atih thu a sawi a, a damchhung huna a thiltihte hriatreng ani tawh dawn tih a sawi.

Larsap General Vijay Kumar Singh (Retd) chuan Pi Lal Riliani chu vantlang tana a hnathawh an hriat reng tur thu sawiin a sulhnu chu chhuanawm atih thu a sawi a, Pi Lal Riliani'n a kalsan tak Pu Lal Thanhawla te chhungkua a tawrhpu thu sawiin zuk leh hmuam do kawnga tha thawh hlawk a nihna chu chhuanawm a tih thu a sawi bawk a ni.

Chief Minister Pu Lalduhoma chuan Mizoten Nu ropui an chan a ti a, Mizoram tana a inpekna, entawntlaka a nungchang mawi tak leh thianghlimna leh hriselna kawnga mipuite zirtirtu ropui tak a nihnate chu an theihngilh dawnlo tih sawiin A pasal Pu Lal Thanhawla a tawrhpu takzet a ti bawk.

Leader of Opposition leh MNF Vice President Pu Lalhhandama Ralte chuan Pi Lal Riliani chu a ui thu sawiin Mizoram tan channa nasa tak anih thu a sawi a, BJP President Dr K. Beichhua pawhin Pi Lal Riliani chu an ui takzet tih sawiin Mizoram tana a thiltih te an hre reng dawn tih a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

HEALTH MINISTER

Health Minister Pi Lalrinpuii'n Private damdawiin thenkhat zingah Mizoram Universal Health Care Scheme zawm duh an awm tih sawiin thawhhona thuthlung ziahfel tep ani a ti a, tunhnaia BN Hospital, Aizawl nen thawhhona tur thuthlung an ziaak thei chu lawmawm atih thu a sawi.

Health Minister chuan social media kaltlangin BN Hospital, Aizawl nen an thawkho tur lawmawm atih thu a sawi a, MUHCS chungchangah Private Hospital thenkhat zingah Mizoram sorkar thawpui tum an awm mek thu sawiin thawhhona tur thuthlung pawh ziah fel a nih tep tawh a ti a, Kohhran hrang hrang Damdawiin te pawhin mipui rawngbawlina a ni tih hria a health care chungchangah sorkar hmalakna an rawn zawm chu a lawmawm atih thu a sawi.

Health Minister hian December ni 16-a Press Conference a neih na ah kumin sorkar tangka kum kal lai April ni 1 atanga December ni 16 inkarah Mizoram Universal Health Care Scheme hnuaia damlo mi 59,602 enkawlina senso cheng vbch 100 chuang sen ral ani tawh tih a sawi a, Mizoram Universal

Health Scheme in senso a tumsak damlo zinga 68.56% chu sawrkar damdawiina enkawl an ni a ti bawk.

<><><>

SYNOD PRISON MINISTRY

Home Minister Pu K. Sapdanga’n inrinni khan Synod Prison Ministry buatsaih, Jail tang chhuak ten nun kawng dik an zawh zel theih nana um zuina hun ‘Ex-prison inmates follow-up programme’ a hman pui.

He programme hi Nursery Veng Presbyterian Kohhran Hall-ah hman niin, Jail tang chhuak eng emaw zat an tel thei a. Home Minister Pu K. Sapdanga leh Rev. Dr. Rosiamliana Tochhawng ten thu an sawi bakah Jail tang chhuakten an Testimony an sawi bawk.

Jail tang chhuakte pual hian kum khatah vawi hnih hun hman thin a ni a. Tun tum hi kumina vawi hnih an hmanna niin mi 192 an kalkhawm a, tum 6 hman a lo ni tawh a ni.

Mizoram Synod hian Jail-a rawngbawlna hi kum 1984 atang khan a lo kal pui tawh a. Tunah hian Mizoram chhunga Jail 10 awmah Synod Prison Ministry Sub. Committee din vek a ni a. Counsellor 10 ruai mekin, Pathianniah hun bik neiin Jail-ah hian an inkhawmpui thin. Kum 40 chuang chu he rawngbawlna hi kal pui a lo ni tawh a ni.

<><><>

PRESIDENT

President Draupadi Murmu chuan tunhnaia Parliament-in dan thar a pass Viksit Bharat-Guarantee for Rozgar and Ajeevika Mission (Gramin) (Viksit Bharat-G RAM G) Bill, 2025 a pawmpui. He bill hi Parliament thladik thutkhawmah khan pass a ni a. Thingtlanga chhungkaw tinte tan kum khatah ni 125 inhlawhna tur a ni a. Union Ministry of Rural Development chuan ramchhunga thingtlangmite tana eizawnna siamna kawngah bungthar anih thu a tarlang a ni.Viksit Bharat-G RAM G Act hian Mahatma Gandhi National Rural Employment Guarantee Act (MGNREGA), 2005 a thlak dawn a ni.

<><><>